



## Павелнің Тимофейге ікінші пічии

Тимофейге ікінші пічии Павелнің прай пасхан пічіктерінің халғанчызы полча полар.

Пу пічиінде илчі поэының киртістіг полысчызы Тимофейге айланча. Аар үлүс көрзе дее, Павел поэының чуртазы тооза көңнін көдірген Худайны саблапча. Павел өлімнең хорыхпинча, поэын Христоснаң хада мөгі чуртас сағыпчатханын ікінчілебинче. Че олох туста ол христиан тигірибиненер сағыссырапча. Олар даа, Иисусха киртінчеткеннері үчүн, сүрдірерлерін пілчелер нооза. Аннаңар ол Тимофейні (анынаң хада прай христианнарны) Иисус Христостың Арачылағчы паза Хан-пиг полчатханын сағыста тудып, ирееленістер сағыпчатханын піле дее, Христосха киртіністе пик турарға үгреде чоохтапча.

### *Алғас*

**1** Павел, Христос Иисуста Худай молчаан чуртасты чарлирға табылған кізі, Худай көңнінче Христос Иисустың илчізі<sup>с</sup>.  
<sup>2</sup>Тимофейге, хынған оолғына: Худай Пабадаң паза Хан-пигібіс<sup>с</sup> Христос Иисустаң паарсас, өлчей паза амыр хоных сағаа.

### *Чახсы Хабарға киртініс*

<sup>3</sup>Хараа-күнөрте, пазырған сай синненер сыбыра сағынчам. Пурунғыларымнаң пасти, мин арығ көңнімнең салынчатхан Худайыма алғызым читірчем. <sup>4</sup>Синің харах чазың сағысха кирип, өрініске чидіп алар үчүн, сағаа тоғазарым килче. <sup>5</sup>Лоида уучаңда даа, Евника іченде дее полған киртіністі сағысха кирчеткенімненер, синде дее ол сын киртініс пар тіп, пір дее ікінчілебинчем. <sup>6</sup>Аннаңар минің сағаа хол салғаным пастыра пирилген

Худай сыйиин улам өделендірерге сині хатап сизіндірчем. <sup>7</sup>Худай піске хорығыс худын нимес, че кўс, хыныс паза арыҕ сағыс худын пирген. <sup>8</sup>Аннаңар син Хан-пигібістенер киречілестерден дее, миннең дее, Аның чабыҕдағы кизізінең, уйатпа. Че миннең хада, Худай пирген кўзіне төмене, Чахсы Хабарның үчўн иреелестерні алын.

<sup>9</sup>Худай пісті арачылаан нооза. Ол пістің киректерібіс хоостыра нимес, че Позының көңнінең пісті ах-арыҕ<sup>с</sup> поларға хығыртхан. Ол аны Христос Иисустаң пастыра тус пасталар алнындох пирілген паарсазынаң иткен. <sup>10</sup>Ол паарсазы Арачылаҕчыбыс Христос Иисус килгенінең киречілелче. Ол өлімні чох иткен паза Чахсы Хабар пастыра мōгі чуртас<sup>с</sup> чарлаан. <sup>11</sup>Чахсы Хабарны тарадар үчўн, мин аның илчізіне, паза чоннар ўгретчізіне турғызылғам. <sup>12</sup>Аның сылтаанда мин пу иреені көрчем, че анзынаң уйатпинчам. Пилче ноомза, Кемге киртінчеткенімні паза тўгенчі кўнге<sup>с</sup> теере мағаа пиргенні\* Аның хайраллир кўзі парын. <sup>13</sup>Миннең искен пу сын ўгредиимнең устан, Христос Иисуста пар киртініснең паза хыныснаң чурта. <sup>14</sup>Пісте чуртапчатхан Худай Худы<sup>с</sup> пастыра піске пирілген чахсы нимені хайралла.

<sup>15</sup>Син пилчезің, асийдегілер<sup>с</sup> миннең хыйа полибысханнар, ол санда Фигелл паза Ермоген. <sup>16-17</sup>Онисифор көп хати минің көңнім часхарған үчўн, аның ибіне Худай өлчей пирзін. Минің чабыҕа кіргенімнең ол уйатпаан. Римде полғанда, тізең, ол мині, матап тілеп, тапхан. <sup>18</sup>Тўгенчі кўнінде Хан-пигібіс ағаа Хан Худайның<sup>с</sup> өлчейіне турыстыҕ поларға пирзін. Ефес саарда ол мағаа хайди полисханын син поэң даа пилчезің.

### *Иисус Христостың чахсы чаачызы*

**2** Син, тізең, оолғым, Христос Иисустаң пирілген паарсас көңнің тыдып одыр. <sup>2</sup>Пасхаларын ўгрет полар ізестіг кизілерге киречілер көзіне миннең искен нимені читтір. <sup>3</sup>Ана іди, Христос Иисустың сын чаачызы чили, ирееленістерні поэңа алын. <sup>4</sup>Ноо даа чаачы, пастығының көңніне кірерге полип, чурт-хонных сурыҕларына салынмас. <sup>5</sup>Марыҕларда араласчатханнар, оңдай сайбабинчатсалар ла, сыйыхха турысчалар. <sup>6</sup>Істенчеткен хырачы нимісті пурун амзирға кирек. <sup>7</sup>Мин чоохтапчатханны

\* 1:12 «Мағаа пиргенні» теенің грек тілінде «мин Ағаа пиргенні» тіп оңдирға чарир.

сизиніп одыр. Хан-пигібіс сағаа прай нимені оңар поларға польссын.

<sup>8</sup> Иисус Христос Давидтің<sup>с</sup> төлінең сыхханын паза өлімнең тірілдірткенін хачан даа сағыста ал чөр. Мин чарлапчатхан Чахсы Хабар андағ. <sup>9</sup> Ол Чахсы Хабарның үчүн мин, тонағчы чили, кинчедең ала ирее көрчем. Че Худай сөзі кинчедең пос. <sup>10</sup> Аннаңар, талламалары Христос Иисуста арачыланыс табарлары паза мөгі сабланысха кірерлері үчүн, мин прай сидіктерні сыдас турбын. <sup>11</sup> Ол сын сөс:

піс Анынаң хада өлчетсебіс,  
андада Аннаңох хада чуртирбыс.

<sup>12</sup> Ирееленістерні сыдас парыбыссабыс,  
Аннаңох хада үлгү тударбыс.  
Төдір пассабыс, Ол даа пістең төдірленер.

<sup>13</sup> Піс Ағаа киртістіг полбазабыс таа, Ол киртістіг халар –  
Позынаң төдір пазын полбинча нооза.

### *Сынаан польсчы*

<sup>14</sup> Пу чооғымны прайзының сағыстарына кирчет. Сөстерденер таласпазыннар тіп, Хан-пигнің адынаң алдан: ол тик таластар оларны исчеткен кізілерні ардатчалар. <sup>15</sup> Худайның алнында уйаңар нимезі чох, сынның сөзіне орта үгретчеткен турыстығ польсчы полар үчүн, прай күзің салын. <sup>16</sup> Алығ, тик чоохтардаң оортах чөр. Ол чоохтарда араласчатханнар Худайдаң ырахтаң ырах ла польп одыарлар. <sup>17</sup> Оларның сөзі, чабал ағырығ чили, алғым тарир. Именей паза Филит ағаа көзідім полчалар. <sup>18</sup> Олар, кізілернің өлімнең тірілгені пол парды тіп чоохтап, іди сын үгретідең төдір пазып, хайзыларының киртіністерін сайбапчалар.

<sup>19</sup> Че төзінде салылған Худай тазында мындағ таңма: «Хан Худай Позының чонын пілче» паза «Хан Худайның адын алынған кізінің полғаны ла чой киректең төдір пассаын». <sup>20</sup> Улуғ иб-чуртта, алтын паза күмүс ідіс-хамыстаң пасха, ағас-тойдаң даа иткені пар: пірсілері аарластығ, пасхалары кірліге тудынылчалар. <sup>21</sup> Пу кірдең позын арығлап полар кізі аарластығ ызых<sup>с</sup> ідіс полар, ээзіне дее кирек, ноо даа чахсы нимее тузалығ. <sup>22</sup> Постаң тустың хынығыстарына сабылба. Хан-пигібісті арығ чүрекнең хығырынчатхан кізілернең хада сынға, киртініске, хынысха, амырға чағын тудынарға күстен. <sup>23</sup> Хыйғазы, тузазы чох тартыстардаң, ыырлас сығарчатханын піле, хыйа пол. <sup>24</sup> Худай хулы

тартыспасха кирек, че прайзынан чалахай тудынып, тыдымның чахсы үгретчі поларға кирек. <sup>25-26</sup>Тоғырланчатханнарны амыр үгрет. Арса, сайтан<sup>с</sup> позының үлгүзіне кирип алған сөзирбезінең позып аларлары үчүн, Худай оларға, пыросынарға ондай пиріп, сынны пілерге чол ас пирер.

### *Кізілер түгенчі тустарда*

**3** Түгенчі күннерде сидік тустар полыбызарын піл. <sup>2</sup>Кізілер улуғ көөліг, ахчаа сабылған, улуғсырхаас, көкеесім, чабал тілліг, іче-пабаның чооғын испес, алғыстирын пілбес, Худайны улуғлабас, ынағ нимес, <sup>3</sup>чарас пілбес, хоп чоохтығ, позын тудын пілбес, чабал чүректіг, чахсаа хынмас, <sup>4</sup>садынчах, хабылаачы, хоғдайаачы, Худайға сабылар орнына чуртас хыниина тартылар пол парарлар, <sup>5</sup>Худайға тудынаачыхтанарлар, че Аның күзін хыйа тастирлар. Андағлардаң оортах пол. <sup>6</sup>Андағлар, иб-чуртха сыынып алып, тоғырланмас, көп чазыхтығ<sup>с</sup>, хычаланыстарына пос салынған ипчілерге үлгү салчалар. <sup>7</sup>Андағ ипчілер сыбыра үгречелер, че сын піліске хачан даа чит полбинчалар. <sup>8</sup>Ианний паза Иамврий Моисейге<sup>с</sup> тоғырланған чіли, пудурғы кізілер сын піліске тоғырланчалар. Оларның сағыстары ардап парған паза олар киртіністең чат халғаннар. <sup>9</sup>Че олар көп маңнанмастар, Ианнийнең, Иамврийнең хайди полған, пуларының даа сағыс чоғы прайзының алнында іле сығыс парар.

### *Тимофейге халғанчы чакығлары*

<sup>10</sup>Че син пілчезің минің үгредиимні, хайди чуртапчатханымны паза чуртазымның пөгінін. Син минің киртінізімні, ханча мин ирееленгенімні пілчезің. Минің хынызымны паза үр тыстанғанымны даа пілчезің. <sup>11</sup>Син пілчезің сүрдіргенімні паза иреені ханча сыдас парғанымны. Антиох, Икон, Листр саарларында мині хайди сүргеннерін син прай пілчезің, че Хан-пиг прай пу нимеден мині арачылап халған. <sup>12</sup>Прайзы даа, Христос Иисуста Худайның көңнінче чуртирға хынғаннары, сүрдірер. <sup>13</sup>Чабаллар, чойлар, тізең, алаахтырып, алаахтыртып, чабалның түбіне түзерлер. <sup>14</sup>Син, тізең, кем сині үгреткенін піле, нимее син үгренип алғаныңнаң, нимее син киртінчеткеніңнең чурта. <sup>15</sup>Син Худайның Пічиин кічігден пілчезің нооза. Ол Христос Иисусха киртініс пастыра арачыланарға сағыс пирче. <sup>16</sup>Прай

Ызых Пичиине Худай тын кирче, Ол үгредіге, чөп пиреріне, чит-пестерні іле сығарарына, орта чуртирына үгретче. <sup>17</sup>Иди полза, Худай кізізі толдыра паза ноо даа чахсы кирекке тимде полар.

**4** Хан-пигібіс Иисус Христос тіріглерні паза өліглерні чарғы-лирға паза Позының хан-чирін<sup>с</sup> турғызарға килер. Аннаңар Худайның паза Хан-пигібіс Иисус Христостың алнында синнен алданчам: <sup>2</sup>тузы читсін-читпезін, Худайның сөзіне үгрет, ілезіне сығар, чоохтаныбыс тур, тыстаныснаң паза түптестіріп алда. <sup>3</sup>Орта сөсті алынмас тус полар нооза, андада постары хынған, истерге истіг үгретчілерні тапхлирлар, <sup>4</sup>сын пілістең хыйызып, кип-чоохтарға сабыларлар. <sup>5</sup>Че син хачан даа сиргек пол, ирее-лестерге сыдас, Чахсы Хабар тарадыҗызының киреен идіп, тоғызың толдыр. <sup>6</sup>Минің толығ поларым чидіп одыр, минің өлер тузым чағдап килді. <sup>7</sup>Хандыра кўрестім мин. Чолым ирттім, киртіністі хайраллап халдым. <sup>8</sup>Амды мағаа, орта чуртааным үчўн, пу күнде Хан-пигібіс, сын Чарғычы, пирер сый тимнелче, мағаа ла нимес, че Аның килеріне хынчатханнарға прайзына даа.

### *Тимофейге позы толдырар чахығлар*

<sup>9</sup>Минзер табырах килерге кўстен. <sup>10</sup>Димас, пу чуртасха хынығып, мині тастап, Фессалоник саарзар парыбысты, Крискент – Галат чирінзер, Тит – Далмат чирінзер, чалғыс Лука ла миннең хада. <sup>11</sup>Маркты позыңнаң хада алып, ағыл килерзің – ол мағаа нымзанарға кирек. <sup>12</sup>Тихикті мин Ефес саарзар ызыбысхам. <sup>13</sup>Килизең, мин Троадада Карпта халғыс салған таарым паза кинделерім, улам тууптаң иткеннерін, ағыл килерзің. <sup>14</sup>Хазан итчең Александр мағаа көп чабал ниме иткен. Худай ағаа иткені хоостыра нандыр пирзін! <sup>15</sup>Син дее аннаң китен – пістің сөстерібіске ол тың тоғырланған.

<sup>16</sup>Пастап мин нандырыға тартылғанымда, пірдеезі чох полған, прайзы мині тастабысхан. Тоғыр полбазын оларға анзы! <sup>17</sup>Хан-пиг, тізең, алным алып, минің пастыра Чахсы Хабар толдыра таразын паза аны пасха худайлығлар<sup>с</sup> парчазы иссін тіп тытытты. Иди мин ала парыстың тістерінең ос халғам. <sup>18</sup>Прай даа чабал киректең Хан-пигібіс ал халар мині паза Позының тигірдегі хан-чиріне апарар. Хачан даа сабланыс Ағаа. Аминь<sup>с</sup>.

*Халғанчы алғағлар*

<sup>19</sup> Прискилланы паза Акиланы паза Онисифорның ибін алғап сал тур. <sup>20</sup> Ераст Коринф саарда халған. Трофимні, тізең, ағырығда, мин Милит саарда халғыс салғам. <sup>21</sup> Хысхы читкенче килерге күстен. Еввул даа, Пуд таа, Лин дее, Клавдий дее, прай даа харындастар сағаа чолабит ысчалар. <sup>22</sup> Хан-пиг Иисус Христос синнең хада ползын. Паарсазы читсін сірерге. Аминь.